

重修臨漳縣志卷之首

卷首

目錄 凡例 原序 原銜 原檄 圖

卷一

疆域志

四至 紀事沿革 村鎮 河渠 風土

古蹟

卷二

建置志

城池 街巷 祠祀 公署 倉廩 坊表

橋梁 善舉

卷三

賦稅志

人丁 地畝 科則 正賦 耗羨 漕糧

漕項 灘租 起運存留 雜稅 鹽引

學校志

學宮 學署 學額 學田 高等小學

初等小學

卷四

職官表

文職 武職

卷五

選舉表 上

薦辟 進士 舉人 貢生

武進士 武舉人

卷六

選舉表 下

文階 武階

封贈 襲蔭

卷七

列傳一

宦績

卷八

列傳二

名臣 忠節

卷九

列傳三

孝義 篤行 儒林 文苑 隱逸 方術

流寓

卷十

列女傳 上

孝婦 義婦 烈女 烈婦

卷十一

列女傳 下

節婦

卷十二

藝文志

記上

卷十三

藝文志

記下

卷十四

藝文志

詩

卷十五

藝文志

賦

卷十六

藝文志

雜志

卷十七

補餘

卷十八

瑣錄

臨漳縣志卷之十四

藝文 詩

鄴民謠

鄴有聖令時爲史公決漳水灌鄴旁終古斥鹵生稻梁

銅雀園詩

三國
魏文帝

朝遊高臺觀夕宴華池陰大酋奉甘醪狩人獻嘉禽齊
倡發東舞秦箏奏西音有客從南來爲我彈清琴五音
紛繁會拊者激微吟游魚乘波聽踊躍自浮沈飛鳥翻
翔舞悲鳴集北林樂極哀情來寥亮摧肝心清角豈不

妙德薄所不任大哉子野言弭弦且自禁

西園芙蓉池

魏文帝

乘輦夜行遊逍遙步西園雙渠相灌溉嘉禾遶通川卑
枝拂雨蓋修條摩蒼天驚風扶輪轂飛鳥翔我前丹霞
夾明月華星出雲間上天垂光彩五色一何鮮壽命非
松喬誰能得神仙遨遊快心意保已終百年

塘上行

三國魏甄后

甄后袁紹中子熙之妻也曹操破袁尙取鄴都
甄氏留鄴曹丕時爲太子遂納爲夫人生叡郭

貴嬪有寵甄氏居鄴失意出怨言貴嬪譖殺之
葬鄴城北

蒲生我池中其葉何離離傍能行仁義莫若妾自知衆
口鑠黃金使君生別離念君去我時獨愁常苦悲想見
君顏色感結傷心脾念君常苦悲夜夜不能寐莫以賢
豪故棄捐素所愛莫以魚肉賤棄捐葱與薤莫以麻枲
賤棄捐菅與蒯出亦復苦愁入亦復苦愁攘攘起悲風
樹木何脩脩從此君獨處延年壽千秋

西園公謙

三國
魏曹植

公子敬愛客終宴不知疲清夜遊西園飛蓋相追隨
明月澄清影列宿正參差秋蘭被長坂朱華冒綠池
潛魚躍清波好鳥鳴高枝神飈接丹轂輕輦隨風移
飄飄放志意千秋長若斯

西園公讌

三國

魏劉楨

永日行遊戲歡樂猶未央遺思在元夜相與復翱翔
輦車飛素蓋從者盈路旁月出照園中珍木鬱蒼蒼
清川過石渠流波爲魚防芙蓉散其華菡萏溢金塘
靈鳥宿水漪仁獸遊飛梁華館寄流波豁達來風涼
生平未始

聞歌之安能詳投翰長歎息綺麗不可忘

西園公讌

三國應 瑒

巍巍主人德佳會被四方開館延羣士置酒於斯堂辨
論釋鬱結援筆興文章穆穆衆君子好合同歡康促坐
褰重帷傳滿勝羽觴

西園公讌

三國 魏王 粲

昊天降豐澤百卉挺葳蕤涼風撤蒸暑清雲却炎暉高
會君子堂並坐蔭華棖嘉肴充圓方旨酒盈金罍管絃
發徽音曲度清且悲合坐同所樂但慙杯行遲嘗聞詩

人語不醉且無歸今日不極歡含情欲待誰見眷良不
翹守分豈能違古人有遺言君子福所綏願我賢主人
與天享巍巍克符周公業奕世不可追

題西門豹廟

南朝
宋鮑昭

君子爲利溥達人樹德深蘋藻由斯薦樵蘇幸未侵恭
聞正直祀良識佩韋心容範雖年代徽猷若可尋菊花
隨酒馥槐影向窗臨鶴飛疑逐舞魚驚似聽琴漳流鳴
磴石銅雀影秋林

擬太子鄴中集詩八首

并序

南朝

宋謝靈運

建安末余時在鄴宮朝遊夕讌究歡愉之極天下
下良辰美景賞心樂事四者難并今昆弟友朋
二三諸彥共盡之矣古來此娛書籍未見何者
楚襄王時有宋玉唐景梁孝王時有鄒枚嚴馬
遊者美矣而其主不文漢武帝徐樂諸才備應
對之能而雄猜多忌豈獲晤言之適不誣方將
庶必賢於今日而歲月如流零落將盡撰文懷
人感往增愴其辭曰

魏太子

百川赴巨海衆星環北辰照灼爛霄漢遙裔起長津天
地中橫潰家王拯生民區宇旣滌蕩羣英必來臻忝此
欽賢性由來常懷仁况值衆君子傾心隆日新論物靡
浮說析理實敷陳羅縷豈闕辭窈窕究天人澄觴滿金
罍連榻設華茵急絃動飛聽清歌拂梁塵何言相遇易
此歡信可珍

王粲

家本秦川貴公子孫
遭亂流寓自傷情多

幽厲昔崩亂桓靈今板蕩伊洛旣燎煙函崤沒無像整
裝辭秦川秣馬赴楚壤沮漳自可美客心非外獎常歎

詩人言式微何由往上宰奉皇靈侯伯咸宗長雲騎亂
漢南紀郢皆掃盪排霧屬盛明披雲對清明慶泰欲重
疊公子特先賞不謂息肩願一旦值明兩竝載遊鄴京
方舟汎河廣綢繆清讌娛寂寥梁棟響旣作長夜飲豈
顧乘日養

陳琳

袁本初書記之士
故述喪亂事多

皇漢逢屯邅天下遭氛慝董氏淪關西袁家擁河北單
民易周章竄身就羈勒豈意事乖已永懷戀故國相公
實勤王信能定螯賊復覩東都輝重見漢朝則餘生幸

已多矧廼值明德愛客不告疲飲讌遺景刻夜聽極星
爛朝遊窮矐黑哀哇動梁埃急觴盪幽默且盡一日娛
莫知古來惑

徐幹

少無宦情有箕穎之心事故仕世多素辭

伊昔家臨淄提攜弄齊瑟置酒飲膠東淹留憇高密此
歡謂可終外物始難畢搖蕩箕濮情窮年迫憂慄未塗
幸休明棲集逮薄質已免負薪苦仍遊椒蘭室清論事
究萬美話信非一行觴奏悲歌永夜繼白日華屋非蓬
居時髦豈余匹中飲顧昔心悵焉若有失

劉楨卓犖偏人而文最
有氣所得頗經奇

貧居晏里閑少小長東平河充當衝要淪飄薄許京廣
川無逆流招納厠羣英北渡黎陽津南登紀郢城既覽
古今事頗識治亂情歡友相解達敷奏究平生矧荷明
哲顧知深覺命輕朝遊牛羊下暮坐括搨鳴終歲非一
日傳厄弄新聲辰事既難諧歡願如今并唯羨肅肅翰
纘紛戾高冥

應瑒

汝穎之士流離世
故頗有飄薄之歎

傲傲雲中雁舉翮自委羽求涼弱水湄違寒長沙渚顧

我梁川時緩步集穎許一旦逢世難淪薄恒羈旅天下
昔未定託身早得所官渡厠一卒烏林預艱阻晚節值
衆賢會同庇天宇列坐廕華棖金尊盈清醕始奏延露
曲繼以闌夕語調笑輒酬答嘲謔無慙沮傾軀無遺慮
在心良已敘

阮瑀

管書記之任故
有優渥之言

河州多沙塵風悲黃雲起金羈相馳逐聯翩何窮已慶
雲惠優渥微薄攀多士念昔渤海時南皮戲清沚今復
河曲遊鳴篴汎蘭汜躡步陵丹梯並坐侍君子妍談既

愉心哀弄信睦耳傾酷係芳醕酌言豈終始自從食萍
來唯見今日美

平原侯植

公子不及世事但美遨
遊然頗有憂生之嗟

朝遊登鳳閣日暮集華沼傾柯引弱枝攀條摘蕙草徒

倚窮騁望目極盡所討西顧太行山北眺邯鄲道平衢

修且直白楊信裊裊副君命飲宴歡娛寫懷抱良遊匪

晝夜豈云晚與早衆賓悉精妙清辭灑蘭藻哀音下迴

鶴餘哇徹清吳中山不知醉飲德方覺飽願以黃髮期

養生念將老

登高臺行

南朝 宋 王僧孺

試出金華殿聊登銅雀臺九路平如砥千門洞已開軒
車映日過簫管逐風來若非邯鄲美便是洛陽才

同謝諮議銅雀臺詩

南朝 齊 謝朓

總帷飄井幹尊酒若平生鬱鬱西陵樹詎聞歌吹聲芳
襟染淚迹嬋媛空復情玉座猶寂寞况廼妾身輕

銅雀悲

謝朓

落日高城上餘光入總帷寂寂深松晚安知琴瑟悲

鄴都望秋月

南朝 梁 沈約

翹首望秋月秋月明如練照耀三雀臺徘徊九華殿九
華玳瑁梁華裾與璧璫以茲雕麗色持照明月光

鄴館公讌酬南使徐陵

北朝裴讓之

嵩山表京邑鍾嶺對江津方域殊風壤分野各星辰出
境君圖事尋盟我恤鄰有才稱竹箭無用忝絲綸列樂
歌鐘響張旃玉帛陳皇華榮受命垂譽本無因韓宣將
聘楚申胥欲去秦方當飲河朔翻屬卧漳濱醴酒盈三
獻賓筵盛入珍歲晚鳴銅雀兵戢坐金人雲來朝起蓋
日落晚推輪異國猶兄弟相知無舊新

鄴宮

北朝
齊祖
珽

昔日驅駟馬謁命長楊宮
旌懸白雲外騎獵紅塵中
今來向漳浦素蓋轉悲風
榮華與歌笑萬事盡成空

鄴館公讌

北朝
齊裴納之

晉楚敦盟好僑札同心賞
禮成列尊俎樂陳金石響
朝雲駕馬進晚日乘龍上
雙闕表皇居三臺映仙掌
當階篁篠密兩岸荷葉長
束帶盡歡娛誰言鶩歸兩

將命至鄴

北朝
周庾信

大國修聘禮親鄰自此敦
張旃事原隰賓序報成言
西

過犯風露北指度轅轅交歡值公子展覲遇王孫何以
譽嘉樹徒欣賦采蘩四牢盈折俎三獻盡曩尊人臣無
境外何由欣此言風俗旣險阻山河不復論無因旅南
館空欲祭西門眷然惟此別夙期幸共存

過故鄴

隋

段君彥

玉馬芝蘭北金鳳鼓山東舊國千門廢荒壘四郊通深
潭直有菊涸井半生桐粉落妝樓毀塵飛歌殿空雖臨
元武觀不識紫微宮年代俄成昔唯餘風月同

河曲遊

隋
盧思道

鄴下盛風流河曲有名遊應徐託後乘車馬踐芳洲丰
茸雞樹密遙齋鶴煙稠日上疑高蓋雲起類重樓金羈
自沃若蘭棹成夷猶懸匏動清吹采菱轉豔謳還珂響
金埒歸禮拂銅鞮唯畏三春晚勿言千載憂

鄴城懷古

唐
孟雲卿

朝發淇水南將尋北燕路魏家舊城闕寥落無人住伊
昔天地屯曹公獨中據羣臣皆北面白日忽西暮三臺
竟寂寥萬世良難固雄豪安在哉衰草霑霜露崔巍長
河北尙想應劉墓古樹藏龍蛇荒茅伏狐兔永懷故池

館數子連章句逸興驅山河雄詞變雲霧我行覩遺跡
精爽如相遇斗酒將酌君悲風白楊樹

早發鄴北經古城

唐孟郊

微月東南明雙牛耕古城但耕古城地不知古城名當
時置此城豈料今日耕蔓草已離披狐兔何縱橫秋雲
零落散秋風蕭條生對古良可嘆念今轉傷情古人已
冥冥今人又營營不知馬蹏下誰家舊臺亭

鄴臺懷古三首

唐劉長卿

漳水東流無復來百花輦路爲蒼苔青樓月夜長寂寞

碧雲日暮空徘徊君不見鄴中萬事非昔時古人不在
今人悲春風不逐君王去草色年年舊官路宮中歌舞
已浮雲空指行人往來處

半空高棟翔金雀玉宸總帷塵漠漠西陵老樹暝色寒
建安殘妓春情薄曲終紅袖辭尊前簷頭斷瓦飛人間
分香老淚憾不滅秋風吹入苔花斑漢家一片當時土
肯爲姦雄載歌舞銷盡曹瞞萬古魂落日漳河咽寒雨
古臺百尺生野蒿昔誰築此當塗高上有三千金步搖
滿陵松柏圍鳳綃西風燕子東伯勞塵間泉水路迢迢

龍帳銀箏紫檀槽響入漳河翻夜濤人生過眼草上露
白骨何由見歌舞獨不見漢家長陵一坏土玉匣珠襦
鎖秋雨

鄴都引

唐張說

君不見魏武草創爭天祿羣雄睚眦相馳逐晝攜壯士
破堅陣夜接詞人賦華屋都邑繚繞西山陽桑榆漫漫
漳河曲城郭爲墟人代改但見西園明月在鄴傍高塚
多貴臣蛾眉曼綠共灰塵試上銅臺歌舞處惟有秋風
愁殺人

鄴城引

唐張鼎

君不見漢家失統三靈變魏武爭雄六龍戰盪海吞江
制中國迴天運斗應南面隱隱都城紫陌開迢迢分野
黃星見流年不駐漳河水明月俄終鄴國宴文章猶如
管絃新帷座空銷狐兔塵可惜望陵歌舞處松風四面
暮愁人

西陵

唐李邕

西陵望何及絃管徒在茲誰言死者苦但令生者悲丈
夫有餘志兒女焉足私擾擾多俗情投迹互相師直節

豈感激荒淫乃淒其潁水有許由西山有伯夷頌聲何
寥寥唯聞銅雀詩君舉良未易永爲後代嗤

西陵

唐
沈佺期

朝望西陵墓夕望西陵墓望望不復歸月明又十五
月明十五可奈何更對空帳作歌舞銅雀昂然飛不去當
時美人髮垂素我生不如陵上樹年年樹根穿入土

西陵

唐
劉商

魏主矜蛾眉美人美於玉高臺無晝夜歌舞竟未足盛
衰如轉圜夕陽落深谷仍令身沒後尙足平生慾紅粉

橫淚痕調絃向空屋舉頭君不在惟見西陵木玉輦豈
再來嬌鬢爲誰綠那看秋風裏更舞陽春曲曲罷情不
勝凭欄向西哭臺邊生野草來去冑羅縠況復陵寢間
雙雙見麋鹿

登古鄴城

唐岑參

下馬登鄴城城空復何見東風吹野火暮入飛雲殿城
隅南對望陵臺漳水東流不復回魏帝宮中人去盡年
年春色爲誰來

銅雀臺

唐張琰

君王冥漠不可見銅雀歌舞空徘徊西陵賁賁悲宿鳥
高殿沉沉閉青苔青苔無人跡紅粉空自哀
張係閨秀詩見文苑

英華

古鄴城童子謠

唐李賀

鄴城中暮煙起探黑丸斫文史棘爲鞭虎爲馬團團走
鄴城下切玉劍射日弓獻何人奉相公扶轂來關右兒
香掃塗相公歸

銅雀臺

唐程長文

君王去後行人絕簫竽不響歌喉咽雄劍無威光彩沉

寶琴零落金星滅玉階寂寂墜秋露月照當時歌舞處

當時歌舞人不迴化爲今日西陵灰

程係閨秀詩
見文苑英華

銅雀臺

唐鄭愔

日斜漳浦望風起鄴臺寒玉座平生晚金尊妓吹闌舞
餘依帳泣歌罷向陵看蕭索松風暮愁煙入井欄

銅雀臺

唐賈至

日暮銅臺靜西陵鳥雀歸撫弦心斷絕聽管淚霏微靈
几臨朝奠空牀卷寢衣蒼蒼川上月應照妾魂飛

銅雀臺

唐馬戴

魏宮歌舞地蝶戲鳥還鳴玉座人難想銅臺雨滴平西
陵樹不見漳浦草空生萬憾盡埋此徒懸千載名

鄴都懷古

唐
劉滄

昔時霸業何蕭索古木唯多鳥雀聲芳草自生宮殿處
牧童誰識帝王城殘春楊柳長川迴落日蒹葭遠水平
一望青山便惆悵西陵無主月空明

鄴中行

唐
郭良驥

年去年來秋更春魏家園廟已成塵只今惟有西陵在
無復當時歌舞人

鄴中懷古

唐張祐

鄴中城下漳河水日夜東流莫記春腸斷
宮中望陵處不堪臺上也無人

鄴宮二首

唐陸龜蒙

花飛蝶駭不愁人水殿雲廊別置春晚日
靚妝千騎女白櫻桃下紫綸巾

魏武平生不好香楓膠蕙炷潔宮房可知遺令非前事
却有餘薰在繡囊

古興

唐李嘉祐

十五小家女雙鬢人不如蛾眉暫一見可值千金餘自
從身向蓬萊宮出入金輿乘玉趾梧桐樹上春鴉鳴曉
伴君王猶未起莫道君恩長不休婕妤團扇苦悲秋君
看魏帝鄴都裏惟有銅臺漳水流

楊柳枝

唐

温庭筠

館娃宮外鄴城西近映征帆遠拂隄繫得王孫歸意切
不關春草綠萋萋

途中口號

唐

孫逖

鄴城西北望陵臺珠翠繁華去不迴無復新妝豔紅粉

空餘故壘滿蒼苔

魏都

唐

李百藥

炎運精英歇清都寶命開帝里三分盛王庭萬國來
立武疏遙磴金鳳上層臺乍進仙童樂時傾避暑杯
南館招奇士西園引上才還惜劉公幹疲病清漳隈

銅雀臺

唐

汪遵

銅雀臺成玉座空短歌長袖盡悲風不知仙駕歸何處
徒遣顰眉望漢宮

銅雀臺

唐

李咸用

但見西陵慘明月
女妓無因更相悅
有虞曾不有遺言
滴盡湘妃眼中血

銅雀臺二首

唐羅隱

強歌強舞竟難勝
花落花開淚滿纓
只合當年伴君死
免教憔悴望西陵

臺上年年掩翠娥
臺前高樹夾漳河
英雄亦到分香處
能共常人校幾多

答章望之秘校惠詩求古瓦硯

宋韓琦

魏宮之廢知幾春
其間萬事成埃塵
唯有昭陽殿瓦不

可壞埋沒曠野迷荒榛陶甄之法世莫得但貴美璞踰
方珉數百年來取爲硯墨光爛發波成輪求之日盛得
日少片材無異圭璧珍巧工近歲知衆寶雜以假僞規
錢緡頭方面凸概難別千百未有三二真我來本邦責
鄴今朝搜暮索勞精神遺基壞地徧坑窟始獲一瓦全
元醕蘚斑著骨尙乾翠夜雨點漬痕如新當時此復近
簷溜卽以篆字花其唇磨礮累日喜成就要完舊質如
無倫吾才寡陋不足稱思與好古能文人好古能文今
者誰武甯秘書章表民無詩尙欲兩手付何況大雅之

奏聞鏗純

答陳舜俞推官惠詩求全瓦古硯 韓琦

鄴宮廢瓦埋荒草取之爲硯誠堅好求者如麻幾百年
宜乎今日難搜討吾邦匠巧世其業能辨瓌奇幼而老
隨材就器固不遺大則梁棟細棼橑必須完者始稱珍
何殊巨海尋三島荆人之璧尙有瑕夏后之璜豈無考
沉乎此物出坏陶千耕萬劘當翻攪吾今所得不專全
祕若英瑤藉文纜君詩苦擇未如意持贈只虞哈絕倒
君不見鎮圭尺二瑁四寸大小雖異皆君寶

三臺懷古

元馬

熙

舊誤作宋

黃星日落秋聲號
衡漳經滎波滔滔
阿瞞土王欲用事
築臺遂配當塗高
前爲金鳳後冰井
銅雀中居更高迴
大開宮殿令諸侯
遠攬荆吳作藩屏
舳艫煨燼投烏林
東風假便機猶深
有力不斫公瑾脰
夢中愛妾良苦心
天昌帝胃振西蜀
力挫雄圖成鼎足
登登九仞竟何如
一簣未完難進覆
晚年二豎巢膏肓
私心尙擬周文王
由來神助在至德
此宮杵鍤皆民瘡
分香遽作妾婦語
豪氣彌天僅如縷
而堂而構付忘言
了事佳兒應默許

馮高珠翠已晨星漫期朝夕瞻西陵食槽三馬忽歷塊
霜蹠一蹴崇臺傾舞陽亦是狐媚者身後同招羯奴罵
經營次第屬中山不改漢年惟有瓦趙亡燕滅葺者誰
搆木解走鮮卑兒詎知滿目盡禾黍梵宮琳宇又據之
往年讀史殊草草此日登高陪國老酒闌歌罷投荒村
說與西山應絕倒

三臺懷古二首

韓琦

人道姦雄君似鬼姦雄我道鬼輸君身猶北面魏基建
骨入西陵漢鼎分貪與卯金成舜禹不知典午笑桓文

清漳不洗前朝惡日遶三臺送夕曛

魏武當年嗜逸遊高臺空築土三邱
百花輦路隨苔合羣妓笙歌逐水流
僭竊一時人已往姦雄千古史還收
西山遺塚纍纍在衰草寒煙幾度秋

過鄴中

宋 劉子暈

逐鹿營營一夢驚事隨流水去無聲
黃沙日傍荒臺落綠樹人穿廢苑行
遺憾分香憐晚節勝遊飛蓋想高情
我來不暇論興廢一點西山入眼明

銅雀硯

韓 琦

鄴城宮殿已荒涼
依舊山川伴夕陽
故瓦鑿成今日硯
待教人世寫興亡

疑塚

宋 京 鏜

疑塚多留七十餘
謀身自謂永無虞
不知三馬同槽夢
曾爲兒孫遠慮無

銅雀硯

宋 王安石

吹盡西陵歌舞塵
當時屋瓦始稱珍
甄陶往往成今手
尙託虛名動世人

疑塚

王安石

青山如浪入漳洲銅雀臺西八九邱螻蟻往還空隴畝
麒麟埋沒幾春秋

李輔之得鄴城注雨瓦筒以支琴

金

王庭筠

鄴城城南青雀來五樓突兀肩三臺胡桃萬瓦淨如水
春陰不敢生莓苔簷雨欄杆三百尺多年雨齧空階石
繁華已逐水東流斷甃時從耕者得可憐此瓦落君手
愛之不博連城璧錫花如雪錯菱花小字興和猶可識
晴空拂拭支桐君上下一般蛇跗紋哀彈遽止不成弄
千古雨聲愁殺人

疑塚

金蕭冰崖

安排死去千年塚刻畫生前一寸心安得此心如此塚
不教人識到于今

三臺

元郝經

飲馬清漳曲看山上三臺爾來一千年平地猶崔嵬當
時兩京荒鄴下王業開竊國深規模根基重栽培藻幹
厭大行半空丹碧堆冰井極高寒金虎何雄哉銅雀中
天飛醜毒澆鬼魁兆已成鼎足浪戰端可哀諱死看死
期涕泣效嬰孩分香盡遺臭臭腐不肯埋笑殺歌舞人

兩耳生青苔舜禹纔二世漢武尤雄猜公卿皆負土殿
閣磨瓊瑰忍死待伸達癡騃真堪哈誰知篡國臺卽是
亡國胎美人爲黃土西陵等寒灰把酒憶思王山影青
滿盃高詠朔風詩日夕鴻雁來

西陵行

郝經

漢鼎已移心未已不肯分明作天子冕旒北面稱警蹕
造僞萬般難免死臨終更不謀禪代竊國規模有不在
人間解著鬼欺人地下還將縛鬼賣漫言題作征西墓
誰信西陵亦虛墓又說譙都九烏井臭腐屈埋祇幾處

銅雀臺邊鬧歌舞兩眼難看滿黃土何須析履更分香
涕淚咿嚶效兒女君不見永安宮中漢昭烈重向孔明
託後主付君一片討賊心嗣子不才君自取天下英雄
只立德操等區區真溷鼠

鄴臺行

元
翟炳

君不見黃輝萬丈當塗高築臺鄴下矜雄豪觚稜直抵
霄漢極洪基欲比西山牢危樓曲檻照金碧雲楣井藻
分纖毫美人侍宴悉傾國詞客賦詠皆英髦尊前歌舞
未知倦軍中戈戟難忘操四征跋扈尙龍戰三分漢鼎

猶鴻毛曹瞞海內歸神武憐死何爲視兒女西陵松柏
翠生煙臺上嬋娟泣如雨銅雀惟餘漳水流金鳳深埋
城上土鄴臺咫尺若有靈好作移文來弔古

三臺懷古二首

郝經

衰草遺臺尙幾層荒涼無復豔歌聲西陵儘有千年臭
費盡衡漳洗不清

涕泣呻吟後事多高臺空著總帷歌一時姦僞雖難辨
爭柰天長地久何

銅雀硯

元劉因

諸侯負漢已堪憐
直筆何爲亦魏編
却愛曹瞞臺上瓦
至今猶屬建安年

登古鄴城

元杜瑛

杖底行雲拂古苔
袖邊風雨濕輕埃
風聲尉帥黃龍去
水勢朱家白馬來
往事無端隨世變
野花依舊向人開
九原喚起陳書記
坐對三臺共一杯

鄴南城

杜瑛

王氣消沉井逕荒
北風日夜叫枯桑
星移天上河聲斷
草沒陵頭石色蒼
陸地百年滄海變
西陵千古暮雲長

嗚嗚勒勒平川水寒遶陰山憾未忘

三臺懷古二首

杜瑛

歸然雙塔夕陽明慨想曹瞞舊典型九錫初非基揖讓
三分猶自愧英靈水從石椁沉邊白山在香囊分處青
空使後人誇壯麗西陵草木爲誰腥

白鳥飛邊望眼寬興來一石酒杯闌土花漬雨鐵梁澀
蔓草接秋冰井寒樹拂曉風搖北土水涵落日蹴西山
書生豈識興亡事片瓦摩挲認建安

遊三臺

調寄水龍吟

元許有壬

幾年不到三臺往年不似今年好故人雲集遠山屏列
蔚藍清曉趙舞燕歌一時奇絕百壺傾倒對山川如昔
風煙不減但人比當時老 放眼秋容無際碧澄澄雁
天霜早曹瞞事業悠悠斜日茫茫衰草爲問漳流古來
豪傑浪淘多少有建安遺瓦張吾筆陣把英雄掃

三臺懷古次馬明初韻

許有壬

匡國本是人中豪誰令倒海流滔滔炎劉火氣盡資土
一簣欲與天俱高陵谷變遷不改井乃有殃池尉遲迥
狂圖一日雖幸成惡跡千年豈容屏臨漳卒旅空若林

銷沉兵甲江水深只言拊手天下定不知吐哺誰歸心
當時勅敵無吳蜀蹴踏乾坤勞一足果然蔓草猶難除
傾矣天仍不爲覆漢家病已深膏肓不能王人人自王
坐令流毒徧四海重爲屠戮輕爲瘡荀公初信退讓語
瀝膽披肝陳覩縷壽春仰藥固可傷帝且綴旒方播許
莫將基禍尤黃星亦教遺臭爲高陵十功九錫成算在
地維遂裂天柱傾奮威死後無建者身不遭誅骨遭罵
至憎甚欲及儲胥底用更求臺上瓦發邱模金將遺誰
敢擬舜禹真其兒荒涼餘址圯未盡更煩漳水消磨之

秋風蕭蕭動衰草天幸無情天不老鳩居幾換未暇哀
翻手周師戈又倒

漳津夕眺

明
李夢陽

揚舲亂北渚靡蓋望西陵帳殿牛羊下歌臺麋鹿升日
夕松柏路蕭蕭響風樹連沙改故浦空山沒蒼戍徘徊
望霸氣鄴城在何處

渡漳望鄴臺效子建公讌詩

明
王惟儉

天地數有窮泰極運必否在昔建安初兩京蕩無紀家
王拯生民芟暴誅豺兕明兩屬儲后闢邸延多士應徐

既響臻劉阮胥接跬令辰明月夜西園集衆美蘭肴薦
青桂寒鼈燭胎麕細管清音激長袖芳塵起懿親弟與
兄鴻恩良可恃夜深零露濃公子愛玉趾

同李進士觀銅雀硯歌

明何景明

君不見鄴中魏帝無宮殿千秋遺瓦磨爲硯墨客騷人
空嘆嗟朱薨綺構誰曾見李君好古精鑒別冬天拂拭
開煙雪虛堂叩之哀玉音泥沙洗出黃金屑廣州紫石
鸚鵡眼歛山龍尾何希罕濡藻光迴星漢垂蟠花背刻
龜螭斷共憶高臺羅綺春翠眉豔骨飛黃塵提攜故物

悲千代感慨新章泣鬼神君不見臨漳此物難復睹河
沉岸折求者苦縣人相傳爲贗古嗚呼日掘西陵土

鄴北城

明薛蕙

君不見當塗父子全盛時鄴都佳麗侔京師芙蓉池上
開朱邸元武苑中羅羽旗九錫纔終俄受禪宮中更起
文昌殿功臣北闕賜甲第詞客西園侍清晏雄圖擬謂
千萬年於今城闕空雲煙梁沛真人不復起歌舞會無
銅雀妓西陵誰辨古墓田東流惟見漳河水

銅雀臺

明石瑤

西陵綠樹無顏色邯鄲女兒猶豔質魏家空起千金臺
日飄零同瓦礫名姝綺麗皆塵土至今有女能歌舞
妝成乃唱望仙詞夢回不記霓裳譜人間白日奔隙駒
紅顏回首雪盈顱秦樓楚榭今安在日暮殘鴉下冷蕪

銅雀臺

明

袁懋貞

銅雀荒涼禾黍秋君王魂魄幾回遊歌喉舞袖隨朝露
霸業王圖只古邱世間何物無消歇欺孤脅弱成功業
智廢千人役百靈柔腸烈烈還姬妾西陵松柏水中坻
暮哭朝歌知不知遺囑至今稱絕智我云絕智是真癡

四百炎精逢板蕩，輔漢終須受漢讓。
龍爭鼠逐事紛紛，到頭碣石曹丞相。
臺外漳流自古今，臺中瓴甃歲時深。
只供墨客留詞賦，不盡英雄感慨吟。

銅雀臺

明藍昌

曹瞞騁志吞劉社，銅雀臺高瞰中夏。
誰知扼腕有卧龍，豈料垂涎已司馬。
萬里河山尙出師，九原魂魄歸何時。
清秋風雨滿陵樹，落日笙歌繞總帷。
翠娥紅袖恩情絕，廢塚荒臺狐兔穴。
空餘片瓦落人間，千載姦雄磨未滅。

銅雀臺

明張季彥

荒臺蕭瑟雲矗矗霸業歸然清漳曲雄心戲指秦宮馬
割據分爭亡漢室并吞河朔中原土枕流築臺起金屋
華簷飛拱高插天雕檻迴廊如相續三臺繇延複道通
蛾眉繡帶圍春風絲竹清切歌聲細鈿蟬搖落舞影工
日暮燭光催曉曙月明香篆失晴空行樂已愜百年意
老驥尙懷千里志二喬東南鎖未來碣石且標漢相字
分香賣履意深沉誰能識得平生事隴雲封樹暗藏身
七十二塚宛相似徘徊灑淚望西陵囑語猶殷朝暮情
雄圖千載銅雀老壞道殘垣生秋草唯有當年翁仲石

蒼苔剝落沉沙磧瓦礫猶鑄漢廷安
歷代磨洗識斷壁

銅雀臺弔古歌

明謝榛

龍飛白水承火德千里草青漢家厄
曹瞞秉鉞剪羣雄獨據中原此盡力
蓋棺一縮九州心西陵日暮愁雲色
地荒銅雀空莓苔世變銅駝祇荆棘
亂機相仍天有知長風忽來正歎息
歌舞尙多身後情玉顏慘淡雕欄側
斷腸雨淚滿衡漳嗚咽至今流不極
流不極悠悠復悠悠那見翠華耽晏遊
勝境無窮樂有限建安人去浮煙收
誰知千載鄴下客不教寂寞河山秋
却憶騰蛇乘霧

翻自謂松楸直上儼豪氛

鄴下懷古二首

明 朱延璟

至鄴訪三臺立雲鬱不開魏帝方窺鼎指顧傾風雷長
安有左闕銅鳳故崔嵬植臺表以爵意欲凌八垓臨淄
方弱冠帳下禮賢才九錫陳廣殿酌酒橫金罍平生能
明斷臨事意不回老而耽枕席親愛多徘徊總帳空歌
舞西陵多塵埃高塚七十二所望亦疑猜昔令皆出嫁
今胡留禍胎治亂殊所命子桓奚從哉至今臺上瓦珍
重若玫瑰贗鼎踵相續愚人日徵催君王誠良苦千載

爲人災雄心與壯觀同作不燃灰漳流在天地魂遊倘
復來月上雲散去霜樹白皚皚

俯仰鄴城下風流久不振此地有宮室華屋列重茵盈
盈中山女當時聞姓甄弱齡弄筆硯彤管恒自珍諸袁
無遺種得近至尊身君爲五官將羅綺耀青春君爲魏
太子芳華燿若新君今登九五寤寐日以親如聞恩意
薄妾未知所瞋洛陽好宮闕椒房翡翠陳長秋久虛位
遙望掩衣巾皇嗣日以長日月如車輪鬱鬱此宮內理
髻雲生塵回心倘可冀願言誓三辰誰侍流蘇帳云是

隴西人多才惜薄命千秋感洛神

疑塚

明 周孟中

老瞞生死弄姦權
啗葛分香事豈然
手滅炎精言絕口
涎垂漢鼎罪滔天
荒城寂寂無煙火
疑塚纍纍半野田
漳水年來向東決
會漂朽骨出重泉

登銅雀臺二首

明 呂維祺

銅雀臺上雲蒼茫
銅雀臺下水湯湯
水流湯湯崩岸摧
南城北城兩荒涼
耕人犁破舊宮闕
金鳳冰井煙草黃
草黃煙暗不忍見
山老樹髡西風狂
野婦牧牛瑤華殿

兒童踏破楸梓坊鸚鵡樓頭一片瓦行人拾得珍如璋
殘馱敗瓦尙如此春深歌舞亦可傷傷心別有憑弔意
誰爲建安感興亡可憐多少遊人都埋沒唯見破廟枯
藤絡斷石

憶昔建安才黃土文章埋蒿萊憶昔建安宮高低荒原
燒劫灰劫灰燒殘漳水流宛然如見杜若洲銀楹玉壁
玳瑁殿珠簾漆瓦鴛鴦樓元武苑旁靈芝池赤橋仙都
水殿頭石虎高緯窮奢華連壁流霞恣無休誰憐西陵
紫陌殘歌舞盡被朔風吹作荒原土孤臺空搔首

冷落村燈一杯酒村燈斜照苔碑裂村燈不煙寒徹骨
反覺當年奢華黯無色斷橋渡漳村燈昏潦倒輿夫迷
前村村燈忽斷冥冥茫入荒林遙聞何村犬夜吹菰蘆
深

三臺懷古

明沈儆

層臺煙斷草蕭蕭想像干楹出紫霄雲暗鄴都虛舞袖
月明漳水憶吹簫飛來片瓦姿猶膩拾得遺鈿態尙嬌
登眺幾回情未竭豪華千載不堪招

鄴中歌

明鍾惺

城則鄴城水漳水定有異人從此起雄謀韻事與文心
君臣兄弟而父子英雄未有俗胷中出沒豈隨人眼底
功首罪魁非兩人遺臭流芳本一身文章有神霸有氣
豈能苟爾化爲塵橫流築臺拒太行氣與理勢相低昂
安有斯人不作逆小不爲霸大不王霸王降作兒女鳴
無可奈何中不平向帳明知非有意分香未可謂無情
嗚呼古人作事無鉅細寂寞豪華皆有意書生輕議塚
中人塚中笑爾書生氣

鄴中歌追和鍾伯敬

明譚元春

北風吹漳漳水明落日照人心不平渡口望臺指飛鳥
觸發從前情杳杳英雄作事無可隱恥將仁義換紅粉
分香自是平生事試想高臺爲誰置磊磊瑣瑣本一腸
雄心柔骨無短長銅雀下令少愧恥怒擁如花看流水
臺上女兒多不俗魂歸片瓦硯光綠

銅雀硯歌

明張太微

當今學士重古硯異石紛紛絕葱蒨就中端溪與銅雀
往往見之人共羨近來鄴縣取已深銅雀價貴端溪賤
言我昨從燕京來逢人親下銅雀臺道我銅雀硯最古

恍惚不敢對面開開緘拂拭試一看五色光芒真可玩
堂中彷彿波濤生蒼前倏忽風雲散濤生雲散蟠銅雀
映日浮光色閃灼精英汝已繡真奇體裁無復可刻削
共傳金鐵鏽泥沙又聞鉛錫點燒藥歛之龍尾不敢並
鳳味之石空錯落憶持此硯將西歸只恐化作雙魚飛
琴鶴幾年空寂寞圖書此日增光輝轉看硯背篆雲鳥
魏主經營何機巧千年視瓦堅如石當時財力殫多少
財力殫兮硯始畱今人寶玩昔人愁

漳南行

明
失名

民海集元
卷一四
鯨背橋南看春雲楊柳垂垂千萬村古渠再穿膏澤勻
家家賽社熟雞豚持酒登堂醺西門鄴城千載甘棠芬
掃除東閣待嘉賓敲碁握槊賞鴻文贊皇萬軸不足云
野老瞻像拜仁君

望銅雀臺

明
張鏡心

魏武臺從魏武陵望陵金井何峻嶒臺上美人君不見
坏土未乾三臺崩三臺雖崩尙遺壘魏家社稷空流水
惟餘陵畔草蕭蕭隧窟斜穿卧狐豕古來大德自不猜
不封不樹使人哀笑君心勞徒碌碌七十二塚胡爲哉

至今臺下漳水急
衰莽叢榛風雨泣
金輿玉輦杳何之
無數寒鴉墓上集

西園

謝榛

老去青山計春來黃鳥期
雲霞扶杖遠風雨看花遲
易醉逢歌舞孤懷遣歲時
徐陳不可見空憶建安詩

魏宮

明高啟

翡翠明珠入貢頻
承恩長占鄴宮春
至尊莫信陳王賦
那得人間有洛神

銅雀臺

明劉繪

英雄橫槊弄金杯翠殿新妝甲夜開妙舞清歌雲雨盡
銅臺却笑是陽臺

銅雀臺

明 林彥華

黃星麗天日西匿坐見危臺高百尺當時勝槩孰品題
尙想諸郎有曹植藏嬌貯麗娛姦雄二喬不鎖空春風
千年壘土化荆棘片瓦尙奪陶泓功香銷粉盡繁華去
歌聲不到西陵樹

銅雀臺

明 劉玉

臺前猶是漢山河臺上仍非昔綺羅銅雀不歸遺事在

殘軛爭奈汗青多

漳河弔古四首

張季彥

漳之隈臺崔嵬洞門啟平旦開人流水車奔雷選茂異
登瑋瑰廝由消走鄒枚白登技七步才馳玉輦登金壘
我來斯土一堆黃沙沸白日埋颺颺窟鳥雀哀漳之隈
安在哉

漳之潯快登臨昕炊玉暮饌金啟皓齒漱清音流纖指
發素琴態娥娥聲淫淫大喬裾小喬襟雲紉佩霞爲袞
指明月結同心今我來大陸陰水何淺沙何深漳之潯

何處尋

漳之旁望許昌金爲棟玳爲梁綴火齊懸夜光走諸侯
採殊方千斯倉萬斯箱帝無袞后無裳富周公樂未央
隋洛口秦敖倉德則王暴則亡分香履曷相將漳之旁
亦何常

漳之治竊神器王不王帝不帝我誰欺天命俟百年身
千年計作疑塚七十二生無天死無地亮也龍瞞也魅
大丈夫生死寄青天心白日事望西風揮灑涕漳之治
幾興廢

銅雀臺

明 王雲鳳

我走鄴城道忽惜銅雀臺臺上之主人一去不復回主
人當塗高逆氣一何健餘狂不自禁翠翹三十萬日日
長歌舞玉笋照瓊筵錦殿春溶漾綺窗月嬋娟西陵七
十塚白晝妖狐踞蘆花漳水秋不見歌舞處白鳥四五
來翩然飛且鳴行人發清商遠歌如哭聲野翁向我言
物豈有長好況此亂世雄遺跡不如掃土花蝕殘瓦價
重珊瑚枝朽匠鑿古硯舉世嗟嘆之南望金谷園北望
邯鄲樓萋萋連宿草漠漠晚煙浮

銅雀臺

明 安文奎

臨流臺榭逐風飄
銅雀空勞鎖二喬
漫道當年稱魏武
於今惟聽樹鳴鷗

登銅雀臺

同秦京王舜
典傅源夫

明 王士性

幾度臨漳渚
層臺未有詩
雪晴騎馬至
松影縱杯時
歲月三城暮
江山萬古思
同來一舒嘯
恐有地靈知

銅雀臺和禮亭韻

張鏡心

衰莽寒煙狐兔行
阿瞞死去石郎生
最憐漳水因君濁
夜夜濤聲憾不平

登銅雀臺

明 黃仁榮

銅雀今何在漳河空自流
帳中朝望罷塚上夕陽愁
硯譜收飄瓦圖書出廢邱
一生姦僞盡禾黍總驚秋

還鄴二首

謝 榛

客路多芳草還家春服成
交遊多獻賦妻子問謀生
自得山林計深知猿鳥情
一尊吟薄暮風雨閉柴荆
迢遙囊橐輕詞客本無營
久別兒孫大初歸雞犬驚
幾年違舊業多事感浮生
坐倚中庭樹春風可寄情

鄴下秋懷

謝 榛

風塵勞客計詞賦寄鄉愁雁避胡天雪人經鄴地秋幾年多放浪萬古自沉浮抱膝成孤嘯蒼涼月近樓

三臺

謝榛

歌舞千年計鑿與去不迴豪華空四野霸業有三臺水濶蒼雲動洲寒白月來草花秋露裏寂寞爲誰開

鄴城道四首

明
袁宏道

何處魏離宮荒煙斷葦中獵蹏晴捲雪高隼怒盤風苑古梧桐禿牆崩枸杞紅空臺與流水想像舊簾櫳

仆去前王碣耕來故國墳蜂巢無兩大兔窟有三分夜

火生空樹陰龍戰野雲多人何處所試與定遺文

白日悲難駐英雄誰不然魚膏焚地底蛾黛哭生前南
國香成霧西山石化煙人間絕快事天子作神仙

且勿度前村白楊路漸昏一邱文字鬼千古戰爭魂歷
數孫曹閏風流魏晉繁成蹊人自省桃李不須言

泮林夜月

明李經

月中雲外影婆娑冷露無聲夜若何料得霓裳應有意
清光偏照泮林多

泮林夜月

明趙友琴

瓊樓高處玉笙寒，光照芹宮上碧欄。此夕不知天近遠，攜來香袖月中看。

校士喜雪二首

石存察院
堂東北隅

明 呂邦燿

片片碎瑤華，霏霏散玉砂。竹擎和露重，鳥怯帶風斜。貧入長安夢，春虛御苑葩。喜看索句者，落筆巧生花。雪色暗飛霞，寒雲冷絳紗。瑞占河朔稼，解作故鄉花。黃竹思周帝，銅臺笑魏家。堪憐含凍者，呵筆亂如譁。

漳水洪濤

李 經

混混泉源出發鳩，洪濤百折向東流。幾來河伯重相訪，

問俗還須巫再投

蔬園

李經

清流南去瑞煙迷
秋到田家遍綠畦
老圃不忘勤苦事
月明同話小橋西

野田

李經

極目南疇百里平
況逢時雨更關情
田家耕織無他事
莫怪桑間雉不驚

鄴城懷古

明袁中道

只作詞場看何人
不可傳霸圖
無永歲文字有長年
甄

女蒲陳怨何郎粉唱元至今臺上死和墨尙生妍

三臺

趙友琴

躡屐登臨作壯遊蒼苔翠蘚不勝愁斜陽吹笛梅花落
歌舞聲聲漳水流

西陵

明 杜 瑛

望眼憑高入杳冥偶隨飛鳥到西陵波聲冷撼蒼崖石
霜氣晨凝老樹冰自謂摸金神可侮豈知破塚鬼還憎
卻憐橫槊英雄志留與詩人說廢興

三臺硯

明 張載道

銅雀臺高漳水深炎精王氣此銷沉後人不解興亡憾
淘洗殘甎擬斷金

漳南望三臺遺址

明 崔 銑

草樹蒼蒼夕照開望隨飛鳥到三臺何人解剷爲淫跡
異代空懷作賦才勝地幾年鍾王氣雄圖一旦變寒灰
多情輸與臺邊水又逐長風滾滾來

九華基

明 景 芳

金屋二三勢已頽野花嘒鳥共徘徊不知春去誰爲主
空對西風土一堆

官路垂楊

景芳

煙郊晴望路迢迢樓上東風春色饒多少遊人行駐馬
鶯花千轉爲誰嬌

過鄴弔謝茂秦山人

明吳國倫

幾渡漳河不見君半生消息旅中聞談詩夢老燕山月
鼓鈇歌寒雁塞雲四壁琴書留慘澹諸王恩禮罷殷勤
誰移一片韓陵石爲汝重題處士墳

三臺

張載道

漠漠三臺遞古今西陵翠柏結寒陰我來慵自登銅雀

愁聽瀟瀟風雨吟

西陵

明 趙王厚煜

行道迢迢屬暮春
舟停煙渚訪遺塵
西陵無限山花放
不見當時歌舞人

銅雀臺

明 趙王義易

霸業千年事已空
荒郊宿土草叢叢
銅臺雲渺三更夢
總帳香消一縷風
鳥跡遍留今廢址
燕飛爭識舊離宮
東流無限漳河水
日夜滔滔萬古同

暮春重遊銅雀臺

趙王義易

三十年來續此遊漳河依舊抱臺流今今古古一銅雀
雨雨風風半土邱百世英雄空自老當時社稷更誰憂
莫將天地傷多事不覺浮生已白頭

西園

趙王羲易

當年飛蓋向西園七子才名今尙存
萁豆詞章先落魄芙蓉館閣已銷魂
春來春去誰爲伴花卸花開總不言
俯仰古今清夢裏空留遺響在中原

銅雀臺

明趙王恒易

衡漳一望水滎迴魏武雄圖此地開
漢室三分成霸業

中原獨據起高臺
總帷夜月素娥曲
銅雀春風紫玉杯
今日西陵漫秋草
寒鴉唳盡暮猿哀

鄴城懷古用馬時良韻

明 徐培植

悵望空城感自新
風沙凜凜濁河濱
臺前翠黛埋衰草
池上朱華散路塵
漠漠寒山隨去馬
荒荒白日送遊人
風流轉眼看都幻
獨有西陵月較真

夕登三臺

明 王一鳴

荒山躍馬艱頻出
邀客攜壺快並遊
入夜樓臺孤月細
隔河蒼翠古林稠
龍蟠虎踞君臣日
短髮長心戰鬪秋

千載凍雲供一醉可無高興跨應劉

漳河懷古

明 包紳

漠漠平沙送客襟乾坤雄峙昔年心
春風銅雀有興廢斜日清漳無古今
七子才名空寂寞三分霸氣總銷沉
人間何處征西墓凍草寒雲結憾深

鄴下懷古

明 申涵光

漳南落木遶寒雲野雉昏鴉魏武墳
不信繁華成白草還將歌舞囑紅裙
西園亂石來三國古瓦遺書認八分
七十二陵空感慨至今誰說漢將軍

登銅雀臺

張鏡心

從來不弔望陵宮
此日登臨笑魏公
草滿荒岑惟野雀
雲迷沙渚斷飛鴻
殘魂嗚咽悲漳水
複道煙花散晚空
卻怪阿瞞成底事
一坏荒土古今同

和圓川先生登銅雀臺

張鏡心

銅臺金井亂煙中人道
當年魏武宮
草滿孤岑惟野雀
雲迷沙渚斷歸鴻
總幃歌吹歸塵土
疑塚蕭涼起暮風
自從豪華無覓處
一坏荒土古今同

渡漳河

國朝
李繼白

臣海鼎元
卷一四
蚤發天黨門暮涉漳河水云是故鄉流如或見城市黃
昏褰車帷亂呼擁舟子鹿谷太鼃谷交口明月是此地
勢未張建瓴下千里飛濤崩岸積澎湃震無比豈知溯
流尋盈盈衣帶爾古人重初服清濁尙自矢

銅雀臺懷古

國朝
彭始奮

內豎傾漢業乾坤付黨錮羣雄皆自爲割據不相附黃
星起真人得以延其祚百戰竟三分舉世猶鼎沸建國
誇富強築臺漳水路仰觀渾如影岌業壓天霧香煙帶
鄴都雄風拔官渡勢割太行雲映耀西門樹詎知世代

改繁華如朝露綺閣鞠茂草瓊樓遊狡兔臺空夜月寒
秋深旅雁驚鼙鼓付殘霞歌吹空日暮登臨感慨生中
情不自固閒吟銅雀悲猶憶銅雀賦片瓦何飄零徘徊
空四顧松柏望西陵止有曹公墓

渡漳河

國朝
張恂

驅車破曉煙過眼驚殘壘迷離野渡寒古懷秋色裏不
見銅雀臺但見漳河水

弔銅雀臺

國朝
抗冠世

銅雀臺高面截業衡漳如帶環相列曹瞞昔日踞稱雄

金碧輝煌恣僭竊鳳閣薨薨結蜃雲龍樓屹屹吞虹蜺
八珍帶露調金莖七寶連泥和玉屑翡翠屏前歌曲長
鮫綃帳裏舞搖曳綠裙紅袖滿宮帳錦瑟朱絃彈夜月
傾倒青尊興未闌復傳丹詔出雙闕詞臣並命立鴈池
拂紙詩章各一閱濟濟衣冠不記名依稀七子材堪絕
揮毫鄴水動朱華染翰西山驚白雪賦罷朝回臣庶喜
詩成奏進君王悅更兼武士盡赴桓虎奮龍驤轟烈烈
戈戟森森紫霧寒旌旗閃閃清霜冽指驅似電刃飛光
叱咤如雷衣濺血只說金甌永萬年誰知薤露隨朝歇

飛雨散幾何時草長蘚翳風景別君不見諸葛龍崗
千古新爲臣信須立忠節

銅雀臺

國朝

景日昡

黃沙十里寒日落西陵古寺振殘鐸衰草荒原冰雪深
土人爲我指銅雀橋邊松柏鎖空煙臺上春風不可作
嗚呼雲澹澹兮雨漠漠噪晚鴉兮竄狐鼯曹瞞對此應
魂削當年豈料此蕭索

銅雀穿硯歌

國朝

李鍾盛

霸業消沉曹氏滅銅雀荒涼漳水咽片瓦一千三百年

化而爲硯捫筆舌憶昔兵火揚輝煌三臺一炷比阿房
一時土木盡灰燼殘瓦胡爲留河旁似壁不蒲亦不穀
又似維翰之硯穿其腹上有二十八宿之星辰下有初
旬未滿之月窟噫嘻吾叔有筆大如椽吾叔詩成思穆
穆墨雲淡掃筆花香星月流輝照書屋

銅雀臺

國朝商盤

刑餘遺孽曹吉利炎劉火燼窺神器南枝不許夜烏棲
大耳紫髯分鼎勢五官含睇迓靈芸八斗多才賦洛神
老子於茲興不淺銅雀臺藏佳麗人昵昵窗前兒女語

賣履分香淚如雨羣婢無心望墓田上春何處呈歌舞
漳水無情日夜流西園賓客一時休三馬同槽移魏社
蕭蕭疑塚成荒邱

銅雀臺

國朝 嚴遂成

銅盤捧露將辭漢周文心事人皆見詎無私語屬阿奴
垂死慙慙聲色戀濯龍樹血梨根傷凭几分香淚數行
樓飛銅雀一丈五總帳朝昏納歌舞舞袖迴風歌遏雲
地下殘魂聞不聞運移典午國改步無復宮人守遺墓
風雨漳河愁殺人漆燈夜闕西陵樹

鄴川行

國朝

王大仍

大河南北渺茫茫斷煙野水何蒼涼鄴城百二屹金湯
巨室大賈皆多藏雕甍畫棟爛生光闐闐賃聚無空房
前阻黃河浩漭決北有漳水環其傍客至蘭膏耀華堂
上下今古生悲傷孟德當年雄莫當布魯紹述空猖狂
功成銅雀俯清漳蛾眉宛轉聲激揚陳思負才工文章
中郎篡獻比虞唐倏忽懿炎起蕭牆西陵拱木皆無望
昨夜西賊百萬彊縱橫燕秦無深隍孤城得全迎壺漿
蚩蚩安知綱與常瀕年山左滋跳梁塗公一騎遭屠腸

丈夫報國裹沙場挫威失計憂廟廊感時賈生太息長
補牢應須及亡羊遠謀肉食誰能臧客去欹枕空徬徨

銅雀硯歌

國朝

汪師韓

羽陽宮瓦紀千歲甘泉宮瓦題長生羸顛劉蹶劇驟驥
瓦頭零落留殘銘建安都許袁劉喪司空曹侯位丞相
鄴京閣道起三臺銅雀中央屹相向崢澠返旆總帳懸
伎樂百戲當改元諸夫人過自伏魄香銷組廢荒墓田
精舍譙東迹並掃憤懣臺郎來獻弔將軍降趙少府誅
青雀化鸚赤雀踔臺更金鳳石室空興聖改寺大魏攻

鯉鮓又見築葛履棄瓦翻貴如璧琮魏國先生雅鑒古
說易滄陽稱易祖權衡輕重管夷吾心胸開拓陳同甫
貽我硯材雀不渴蘇斑著骨波紋活章求歐奪兩抱慙
但日鈔書忘腕脫古來書厄秦與新五厄遞及湘東焚
此硯與書謹有存幾回濡筆傷斯文

鄴都

國朝
薛所蘊

西陵何處是歌吹寂無聲雄圖于載盡孤墳對月明

過鄴城

國朝
施閨章

秋青山色太行來畫錦堂前酒一杯借問西河人不識

至今漳水說銅臺

漳水眺望

國朝

焦繼章

履壞香消不記春
妓魂曹鬼已成塵
就中獨有漳河在
風浪而今愁殺人

銅雀硯

國朝

許孫荃

萬片飛甍漳水濱
銅臺占盡鄴宮春
傳來白璧連城價
羨殺黃金作賦人

泛漳水望銅雀臺故址

國朝

鄂容安

暮雲無限擁荒臺
漳水迢迢一棹迴
兒女英雄竟安在

雀飛莫怪不重來

漳河覽古

國朝

朱樟

阿瞞何事築層臺
賣履分香亦可哀
總帳只教歌妓哭
芝田誰見處如來

將登銅雀臺過漳河

國朝

張宸

躍馬向三臺
揚鞭漳水隈
寒沙勢空濶
獨鳥意徘徊
舊磧沉銅瓦
秋風起霸才
潺湲流不盡
楓荻自悲哀

懷桐實客鄴

國朝

王士真

鄴下山河美
頻年感發興
秋風渡漳水
斜日弔韓陵
四

代浮雲過三臺古木增論才公讌後君得似崔陵

銅雀臺

國朝

郭洽

臺閣連雲起憑欄萬壑幽川原入故國風雨暗鄉樓月
冷芙蓉夜香銷玳瑁秋興亡千載事漳水任悠悠

渡漳河望銅雀臺

國朝

張榕端

銅臺凝遠望秋色滿衡漳沙濶行人小天空旅雁長朔
風吹草木落日下牛羊歌舞何年事悲笳起大荒

過銅雀臺

國朝

劉雷恒

西陵誰復望歌吹承新恩珠簾延素月錦瑟對芳尊天

田漢鼎元
命尙有待蛾眉安足論如何拾翠女掩涕爲東藩

登銅雀臺二首

國朝
張 翥

出郭尋幽況徜徉登廢臺鴉啼迷野樹牛飲出河隈豐
稼中田茁薄雲遠岫來不堪東去水猶自向蒼苔

廢臺誇勝蹟憑弔意茫然遠浦魚鷗接平疇桑柘連河
翻漢苑土煙冷建安輒銅雀飛何處山禽任往還

渡漳河

國朝
計南陽

曉騎衝寒發漳河入望來晨光開浩渺微月隱樓臺水
落鷓鴣近秋深木葉催綺羅如在目回首不勝哀

銅雀臺

國朝 王堂茂

漳水齧荒陂高臺半已墮分香懷昔念亂塚動今疑題
咏嗟游紀奸雄笑客癡西山餘伯氣風雨怒濤移

晚渡漳水

國朝 陳浩

古渡集昏鴉舟人渡口譁霜清林脫葉風急浪翻沙卧
病憐詞客驅寒憶酒家前村燈火近徒御望停車

曉渡漳水

國朝 孫翼德

殘月明沙岸疏星渡曉舟櫓聲驚宿鷺帆影亂輕鷗雲
暗孤村樹煙迷古驛樓銅臺遙望處渺渺曙光浮

漳河

國朝 宋 琬

悠悠驅馬渡漳河
河上秋風落木多
鐵鳳高飛沉碧瓦
玉鳧深閉長青莎
平原蕭瑟遊麋鹿
古堞參差牧駱駝
況是應劉俱寂寞
中流慷慨一悲歌

銅雀瓦

宋 琬

三臺縹緲鬱相望
俯眺中原接太行
鳳嘴香殘歌舞散
魚鱗瓦冷館池荒
漆燈詎有千年焰
繡帳空施八尺牀
何似金人汾水上
茂陵風雨泣劉郎

鄴下有感

國朝 趙進美

赤橋風急野煙收寢殿人稀總帳愁花外銅鏡清入夜
露中羅綺靜知秋莓苔霧暗芙蓉水鳥雀天寒玳瑁樓
白髮欲生思秉燭蕭條海內少應劉

臨漳懷古

國朝 宗 觀

鄴下聲華今尙存望陵極目控東垣兩朝父子文章伯
亂世君臣戰鬪魂銅雀有時吹野火濁漳不斷走中原
西風詞客漂零過飛蓋還思清夜園

雀臺懷古

國朝 王無逸

銅雀臺臨漳水邊朝朝臺畔起寒煙珠簾異代理荒草

錦纜斜陽挂野田在昔英雄餘戰伐只今歌舞賸山川
月明不解興亡事猶放清輝照往年

魏宮懷古

國朝 吳 玟

九錫方酬百戰勳英雄梨樹共成塵香新魏帝章臺妓
枕冷陳王洛水神白羽雀飛聞識鬼青頭雞唱現長人
可憐遺緒無多在駢首山陽作晉賓

三臺懷古

國朝 宋鳳來

漫言宮殿似蓬萊千載消沉只廢臺歌舞已凋朝露散
旌旗無復夕陽開三分霸業空燐火百戰雄風付劫灰

惟有漳流流不盡往來人弔建安才

三臺夕眺二首

國朝 秦 鎬

重臺雪盡轉晴暉歲暮登臨願不違想像十年雙放屐
徘徊萬里一沾衣冰河伫望乘詩興雪磴層攀仗酒威
徙倚月明聽過雁鄉心片片逐雲飛

荒梯仄徑倚雲隈病眼憑高亦自開天倒明河隨地轉
沙平片月擁杯來地經百戰無全碣人去千秋有廢臺
莫漫臨風論作賦操觚實愧仲宣才

鄴中懷古

國朝 尤 珍

風流佳麗魏王都憶昔英豪創霸圖鄴苑人空花自落
銅臺妓散鳥爭呼五官事業埋荒隴七子才名付酒爐
惟有漳河東逝水年年春漲浴飛鳧

經鄴城廢址

張榕端

荒原誰識帝王州芳草萋萋古渡頭世代興亡餘史牒
歲華榮落自春秋城頽殿宇無遺址河齧桑田失故流
獨有太行山不改還舒青眼待人遊

登銅雀臺

張榕端

銅雀惟餘舊址存霸圖消歇更誰論河侵古岸丹甍堞

風走狂沙白日昏一帶行山拖遠嶂幾堆疑塚贖荒墩
徘徊自昔笙歌地陣陣歸鴉噪晚村

西門大夫

國朝胡煦

三老頻將娶婦誣鬼神何自有登徒檄文幾度箴河伯
祀典千秋報大夫別具胸襟開障翳高提手眼出規模
若言守墨皆循吏只好從容聽女巫

史大夫

胡煦

渡頭古廟柏森森想見當年惠愛深川嶽効靈分綠水
郊原留路走黃金平教膏雨生春腳無復雲霓有戒心

留得故渠遺跡在野塍荒草占秋陰

漳河

國朝
劉景耀

太行東下水縈迴舊有曹瞞銅雀臺梁苑春風隨樹舞
吳宮夜月入舟來平沙淺草馬難渡急浪晴空燕欲猜
往事何須更搔首陶然長嘯一銜杯

過鄴城懷古

國朝
何士光

為憐漳水遶雄圖魏武當年舊建都負我負人言尙在
稱王稱霸業全無許昌矯詔應無漢赤壁飛煙幸有吳
此日渡河風雪勁撫今弔古幾聲烏

銅雀臺

國朝陳誥

銅雀當年鼎構成西陵複道度蓬瀛歌喉時雜波聲細
舞袖頻翻柳線輕等與天齊心不盡勢當瓦解力難爭
猶餘故址荒煙裏流水潺潺哽咽鳴

銅雀臺步王問韻

國朝楊璿

銅雀當年歌舞休荒臺零落冷如秋雄風久已名三國
霸業空餘土半邱岸外黃沙連白霧河邊殘月照清流
行人漫說興亡事今古茫茫無盡愁

鄴城夜坐

國朝鄂容安

臣海果元
卷一四
一燈疎影駐星軺夢隔漳河去路遙詩思劇憐虛白日
雄懷無那對清宵錦堂夜雨空瀟灑銅雀春風久寂寥
應有征鴻向北去雲陰好爲散層霄

鄴臺懷古

國朝
吳應棻

鄴中遺事感興亡霸業忠勳兩渺茫魏主荒臺無瓦礫
韓陵片石有文章侍中衣浣空名里上相功成始築堂
懷古正當秋盡日暮鴉衰柳噪斜陽

寄張獻彤鄴中

國朝
王士真

聞君顛悴魏王城地是黃初歲月更應阮不來風景盡

山川如舊水蕪平池空鄴苑花猶落春到銅臺草又生
此地從來易憑弔試磨殘瓦待題名

過臨漳同武宣作

調寄醉蓬萊國朝

黃蘭

嘆年來草草嘯侶吟朋客中強半昨日蘇門倏又三臺
畔漳水滔天鄴城墮地無復當時觀狡獪曹瞞豺狼石
虎一般塗炭慨古嗟今側身憑弔勳業星飛豪華冰
渙漫說文章千載詞人擅徐應王劉風流滅沒何處西
園宴伫望蒼茫欲酬斗酒把鷄裘換

同張大司馬遊銅雀臺

國朝

王象天

漳濱何自起離宮遙望西陵弔魏公竊命周文無采鳳
平分漢鼎有哀鴻吹臺翠滅香風散總帳魂消野色空
賸得殘軼擬近古建安年號到今同

官路垂楊

王象天

依依疏幹結長廊古道花飛滿夕陽桑海憑他經幾變
青姿不改舊衣妝

九華基

王象天

九華宮殿自何年紫陌披雲石虎傳曾去流連看古蹟
幾堆衰草起寒煙

銅雀臺二首

王象天

我來漳水隈，弔古上銅臺。
曙色臨荒草，落暉映野苔。
望陵春雁泣，疑塚夜猿哀。
霸業今安在，空餘土一堆。

憑弔望陵宮，鬼鬼古鄴東。
一時歌舞絕，千載感悲同。
月落吹臺暗，雲收總帳空。
姦雄無限事，盡付濁流中。

三臺遺跡

王象天

銅雀傳留幾，度秋總幃人去。
一沙邱可憐，歌舞同流水。
猶賸殘甃說未休。

漳水

王象天

水自東流臺自西源分清濁到今迷等時浪動金鰲戲
朝海翻江作畫題

弔古

國朝

樂應昌

魏祖乘權日羣雄據四方覬心吳與蜀遺憾履兼香涑
水千年案銅臺一夜霜我來尋舊址煙草倍淒涼

秋九月供兵便道登銅雀臺

國朝

張子寅

羽書叢裏上荒臺水色山光次第來雀瓦齒芬天下士
槩詩魂冷建安才銅駝淚灑西陵怨輦路香銷歌妓衰
惟有年年秋色沒悲風吹起陣雲開

辛丑冬再登三臺時將謝事

張子寅

雀臺無復舊時雄
滿目蒼涼煙樹中
歌舞已隨流水去
山川猶遶故園空
寒冰井上遺殘礫
丞相碑前宿暮鴻
單騎遣懷尋勝覽
白楊青草自西東

銅雀臺

國朝

郭扞

遺搆巍峩鎮四維
會聞妄想貯蛾眉
西陵疑似樵蘇引
總帳銷沉野火吹
繡瓦尙餘迷蔓草
宮釵幾見問荒陂
高臺歌舞臨風歇
魏武當年事事奇

銅雀臺二首

郭治

落日寒空下秋光入望頻
亂煙迷樹色野岸障沙津
歌吹當筵散鶯花別院春
故人何處是揮淚欲沾巾

臺閣連雲起憑欄萬壑幽
川原入故國風雨暗鄉樓
月冷芙蓉夜香銷玳瑁秋
興亡千載事漳水任悠悠

丙戌同李夢沙陳竹居白漢公讀書銅雀臺

郭治

舊鄴探遺構羣雄事已非
遙思歌舞處惟見塞鴻飛
井榦餘殘碣西陵悵落暉
祇應吾輩在憑眺一沾衣

三臺懷古

國朝 鮑之汾

一亭秋影與山平
四望蕭然百感生
遺令不無兒女氣
分香豈是世人情
風吹大野年年事
水落空臺夜夜聲
用盡漳民多少力
沒留餘築到花城

三臺懷古

國朝

陶穎發

雄圖舊跡不堪求
何事登臨博勝遊
靈雀久沉餘落照
危臺半塌逐波流
祇今清梵蕭條宇
自昔羣妝歌舞樓
回憶繁華千古憾
斷煙衰草任悠悠

漳河卽事

陶穎發

攬轡漳河畔
濤聲百里來
水侵南岸曲
沙壓北城隈
旅

臣海縣志 卷一四
客尋舟渡漁郎帶笠回
踟躕猶立馬暮色隱三臺

鄴二大夫祠

陶穎發

夙昔徽猷著今看俎豆繇
投巫祛俗弊引水漑民田
德與封疆永名垂簡冊
鮮愧余無治術瞻拜仰前賢

銅雀臺送陳竹居歸臨漳

王士真

銅雀臺濁漳路臺下悠悠漳
水流西陵月照空煙樹居
家門對濁漳濱曾向漳流賦
感甄今日相思那可道年
年芳草鄴城春

銅雀臺

國朝

孫肖孫

俯仰當年盛悲歌此日臺夕陽依樹迴雪浪拍天來鬼
火吟青晝雲光壓紫苔尋聲珍舊瓦誰問建安才

銅雀臺

孫肖孫

齒齒沙痕沒馬蹏茫煙迷漫草萋萋山川勝概供憑眺
王霸流風入品題明月猶懸水井照夜烏常傍濁漳嘯
雄詞想像西園側詩賦叢中雜鼓鼙

鄴城春雨

孫肖孫

好雨知時潤遠桑遙天一色曉蒼蒼澄波似鏡連漳水
空翠如煙接太行冰井臺邊低燕雀芙蓉池畔濕鴛鴦

臣海鼎六
卷一四
無私帝力真何有聽去農歌滿夕陽

重陽前九日約淦陽萬開遠刺史三臺登高先一
夕余宿太平寺夢得秋思在芙蓉之句疊成五

律

陳大玠

秋思在芙蓉天高引興濃荻疏橫曙色楓老帶霜容躡
屐凌幽砌尋僧話古松淦陽城不遠紫氣繞花封

瑤函約登眺秋思在芙蓉俗厚歡豐稔民純篤睦雍莫
香金鳳遠雲藹太行重翹企飛鳧鳥憑欄送日顛

宵宿太平寺風清動曉鐘美人憐孔雀秋思在芙蓉隔

水雙移櫂登臺並策筇昔年歌舞境惟有數青峰
公餘欣偶得意愜藉寅恭景羨西門範慚追史起蹤遙
情依玉樹秋思在芙蓉節近登高會開尊豁素胸

幸值昇平世 殊恩重老農漳流沿舊蹟沃壤出新墉
刺史持衡判黔黎潔志從迴車戀分袂秋思在芙蓉

奎樓詩二首

李長庚

參天傑閣勢崢嶸彩筆光搖滿鄴城千古文章歸掌握
累朝人物屬權衡簷前星耀三臺近檻外雲飛五色橫
伫看羣英乘運起漳干風雨聽雷鳴

閣峙東南景運開
泮宮遙借啟賢才
鰲翻錦浪乘陰雨
筆點青雲起蟄雷
紫氣平臨樓外擁
文星高向斗邊迴
士風此日凌霄漢
喜見英華接上台

奎樓詩二首

陳大玠

高峙巍樓秀氣生
好將綵筆詠新成
臨暉梁棟英華盛
挹露軒窗涵覆閎
煥發木天翔鳳羽
昭垂星漢動鵬程
沖霄直北由來近
瑞色朝看接

帝城

璧合珠聯乾象青
卿雲靄靄護

彤廷畿南宿列奎光迥異位樓憑鄴水淳七子芳名符
斗數三臺勝跡應台形

聖朝文運昌明會太史頻占聚德星

臨漳八景詩

陳大玠

太行遠翠

太行疊峙鄴城西湧翠凌空嵐影齊日繞黛痕橫峻嶺
煙開綠蔭障幽谿峻嶒米芾爐峰畫窈窕王維輞水題
綵映

神京羅拱壁欲餐秀色躡雲梯

田海集元
卷十四
漳水晴波

匯濁涵清漾遠流鎔金耀紫日光浮
穀女斜練拖青柳
錦浪迴瀾浴白鷗三晉發源來滾滾
二東達海去悠悠
環渠膏壤陽春裏巫老沉波憶古猷

九華雪霽

九華宮蹟漫追尋雪霽春容做遠林
瑞色新占年穀稔
晴光舊照殿門深霏煙日暖融虛案
潔水冰清愜素心
玉屑瓊英蕪野潤長吟郢曲遜敲金

百陽荷風

十里紅蓮透碧渠
課農日午未迴車
亭亭葉翠連禾黍
灑灑香青襲袖裾
耒耜煙中鋤廣陌
壺漿雨後樂新畬
九重湛露

恩蠲賦衣芟停耨聽

詔書

柳園月色

月明垂柳影
氤氳村婦宵
分起視蠶露
裊桑陰濃似黛
煙凝麥隴染如藍

盛朝康阜逾三代
比戶盈寧勝二南
豁日清輝看不盡

滿園風景鑑中涵

奎閣春光

飛翬峻閣肅翹瞻冲斗文光耀典籤

天闕巍巍隆黼黻士林濟濟卜梅鹽花妍麗日韶華暖
燕語條風淑氣恬屢報慶雲河獻瑞春星奎聚仰堂廉
銅雀飛雲

銅臺基畔草茸茸縹緲飛雲舞妓容樹裏彩凝疑玳瑁
水邊香靄有芙蓉穿林何意因風淡出岫無心釀雨濃
漫說雀隨金鳳去且聽苔徑細吟蛩

迴龍返照

萬家樓閣隱丹楓
雨過村墟返照紅
賈客馳歸行落葉
征人投宿逐飛鴻
雲霄北望

皇都壯平野
東看泰岱崇
古鎮鄰封多接壤
霞光一片
畫圖中

太行遠翠

李長庚

隱隱行山天外停
雲開圖畫不曾局
山靈似有舊要在
日向城西送遠青

漳水晴波

漳水溶溶夾岸平
微波綺縠小舟輕
中流鳧戲浮還沒
爭浴相喧愛日晴

九華雪霽

斑斕晴雪九華春
萬樹花飛色似銀
踏破殘冰窮目望
石家那讓洛城新

百陽荷風

帶露輕盈欲語嬌
波心搖曳百陽橋
微風纔向渠邊過
十里清香野外飄

柳園月色

無邊翠綠露華溥
柳色偏宜帶月看
倚徙園林歸去晚
夜深影轉素光寒

奎閣春光

晴雲靄日好風迎
奎閣輝煌照鄴城
多少煙霞歸畫棟
春花應共筆花生

銅雀飛雲

弔古登臺坐夕曛
蒼茫樹色見氤氲
歸來漸覺衣裳濕
銅雀回看一片雲

迴龍返照

落日殘霞何地無迴龍古鎮更堪娛萬家樓閣絃歌滿
倒掛斜陽對酒爐

太行遠翠

國朝 許象岑

翠色飛空半有無行山迢遞遠峰孤晴嵐淡寫巉巖勢
橫亘長天作畫圖

漳水晴波

出門一望大漳橫東去潺潺流水聲最喜晴帆臨古渡
白鷗紅蓼並含情

九華雪霽

石氏離宮峙九華銅臺東去勢橫斜喜看久雪新晴後
幾處瑤樓映曉霞

百陽荷風

水引長渠問百陽使君旌節蔭甘棠眼前綠畝雲爲稼
隴外荷風陣陣香

柳園月色

簇簇長楊翠靄籠人家都在綠陰中多情更有天心月
影落林梢漾晚風

奎閣春光

傑閣穿雲矗太空
窗楣八面總玲瓏
憑欄最是春光好
看盡長隄十里紅

銅雀飛雲

此地空餘銅雀臺
崔嵬長傍濁漳隈
三分霸業今何在
惟有閒雲自往來

迴龍返照

古鎮雄開氣象函
繁華端的盛東南
樓臺處處笙歌繞
坐對斜陽酒欲酣

太行遠翠

國朝李斌

太行遙峙鄴城西一帶晴光翠色齊自是天然圖畫景
常供萬古作詩題

漳水晴波

漳水西來不記年晴波萬點泛金錢魚龍喜得中流戲
何事洪濤浪拍天

銅雀飛雲

霸主雄臺漳水頭幾回瞻眺不勝愁當年歌舞今何處
惟見間雲天際浮

九華雪霽

石家宮殿起漳干麗景偏宜雪後看玉色銀光晴日裏
一時高下盡同觀

百陽荷風

溶溶清帶繞村莊遍植芙蓉向日芳幾陣好風輕送蕊
頓令阡陌盡生香

奎閣春光

文明照耀徹雲天旭日光搖棟宇鮮一片陸離昭近遠
瑞煙長繞鄴城邊

柳園月色

風吹柳浪綠勻勻映月參差色更新數轉鶯嗁天欲曉
嬋娟隱隱送行人

迴龍返照

樓閣參差入畫圖夕陽返照影平鋪漳南自古稱名蹟
十里遙聞喚醍醐

漳邑八景詩步前任元韻

李宜芳

太行遠翠

碧嶂峻嶒古鄴西矗空佳氣女牆齊頰看積翠如新沐
乍睹遙青憶舊谿吾鄉多山漳邑無之水色天光同杳靄畫圖眉

黛任評題昔人真有觀山興高築銅臺百丈梯

朝來爽氣太行西了髻螺痕櫛比齊入眼林巒皆翡翠
憑欄城郭卽山谿千重蒼碧虛無現一抹丹青宛轉題
恰似吾鄉滄海上蓬萊清淺杳難梯

漳水晴波

奔騰萬馬任橫流滾滾泥沙日夜浮秋水經年憂竈鼯
春波時一見晴鷗西來高阜源清濁有清濁東去深溟

路阻悠回首汪洋悲父老

邑會圯於漳

衡漳底績擬前猷

霸業已空水自流晴波會照翠華浮芙蓉小苑開青瑣

玄武輕舠起白鷗

芙蓉玄武
皆在鄴

臺上歌吹人寂寂灘邊寶

壘事悠悠

漳水曾
得玉壘

祇餘西史休聲在好築陂塘續遠猷

九華雪霽

六出花飛步履尋故宮霽色散平林霏微冰井苔痕潤

嗚咽漳流雪浪深賦就梁園騷客韻春歸麥畝老農心

九華址畔堪幽討片瓦摩挲擬貢金

九華遺蹟共追尋虎旅千門舊若林一自浮雲人事改

祇餘積雪故宮深陰晴瞬轉興亡事曹石冰銷感慨心

聞道寒煙衰草裏當年瓊宇砌鋪金

百陽荷風

村園一一傍新渠田葉縈環使者車十里荷風穿井陌
長隄香氣透巾裾兒童竹馬尋蓮芡父老藜鳩課畝畚
正好披襟臨水坐烝髦細讀勸農書

鄴下西門舊有渠如雲畚鍤祝篝車當年黍雨人含哺
今日荷風氣襲裾漫喜清漣開錦繡還期斥鹵變新畬
勉旃畝澮勤疏濬原隰同登大有書

柳園月色

星稀斗轉柳毵毵燈火村姑夜飼蠶飛絮園邊堆皓素

遊絲月下曳青藍
金波朗澈天輪廓
明鏡清輝舍北南
官燭兩條頻至止
灞陵詩意此中涵

良宵月照柳絲毵
此地偏宜麥與蠶
園裏春畦濃似黛
隴頭桑葉沃如藍
油油黍雨來從北
習習薰風律自南
夜半披星聞擊壤

皇仁無處不淵涵

奎閣春光

奎閣融融快遠瞻
春光潭沍拂牙籤
檻前旭日風吹絮
壁上新詩水著鹽

壁多題吟

幾點遙青觀笏擁
一灣新綠喜

波恬行山漳水應知鵬鶚清秋起華國人文萃陸廉

一登奎閣一翹瞻懷古重披萬軸籤七子才華天漢錦

建安詩賦水晶鹽春光依舊星雲麗文治方新士女恬

但得餘閒還講藝不將案牘畢勤廉

銅雀飛雲

墮簪遺翠埋纖茸想像銅臺舊麗容新起高樓裝玳瑁
別開小苑號芙蓉賦詩對酒歌聲豔散履分香舞隊濃
冷落不堪回首處雲飛四野靜聞蛩

臺邊鴛瓦草蒙茸臺上雲飛黯淡容破壁曾環金屈戍

荒榛舊植玉芙蓉霞浮北寺晨鐘早雨灑西陵暮靄濃
多少繁華銷歇盡興亡遺憾付秋蛩

迴龍返照

此地停車愛晚楓村煙掩映夕陽紅行山日射千重錦

衛水帆飛片羽鴻

十餘里即運河

自昔輓輸推陸海

明時為漕廠

於

今稷黍頌墉崇

迴龍去秋大有

太平風物真堪繪綠野青帘落

照中

漕艘東去達

宸楓彩鷁雲排映日紅地接南船兼北

馬人多角雀與鳴鴻

界連兩省時有爭訟且多流氓

齊風未若唐風樸

末計何如本計崇俗多逐末幾度循行搔首望西陽煙靄野

棠中

乾隆壬戌三月喜雨二十韻四質 李宜芳

皇帝七載春閔雨紀史筆正月雪猶微二月雲空密暮
春過半時未見月離畢豈但麥不登且慮秋難必余時
覩民艱祈禱虔蠲吉請命共肅將恒暘獨惕慄盼斷習
習風愁絕杲杲日詎云帝澤屯當由吏職失天不遺斯
民鬻鬻忽飄疾始也來徐徐少焉流汨汨聞雷聲兩三
入土寸六七頓使咨嗟音變作笑語啞負耒向新畝播

種攜饌餽坐見庶縣縣行看獲控控鄴下慶三農漳濱
開百室此皆

天子仁无逸勤知恤何敢貪天功而自詡誠壹惟隨擊
壤儔共喜靈雨溢作歌示不忘三月二十一

癸亥六月六日喜雨

李宜芳

風雨團聚亦何速時乎時乎六月六四句愁緒縈心苗
一雨歡聲溢葑屋憶自來牟初屆秋蘊隆日日憂恒燠
赤烏炎曦旱魃驕青苗黃落老農哭暴疔擊鼓徒紛紛
屈指金行期已蹙眼穿雲霓喚奈何再遲十日則無穀

天心仁愛往必復谷風初轉黑雲轟電掣雷奔勢不停
一瞬平疇波灑灑嗟乎此地旱相繼年年禱雨如常例
但得伏秋三日霖多稼頻歌不斂穡旣雨旣處甚平常
不雨忡忡憂正妍旱是一片古成言救荒安得有奇計
吁嗟乎救荒安得有奇計

漳水曲

李宜芳

漳水年年嗚咽流繁華彈指幾經秋英雄割據今何在
蜃海虛幻土一邱憶昔阿瞞父若子盜名竊字鄴城裏
三臺高與浮雲齊銅雀春深傍漳水水邊樓閣共嗟噫

彩女靚妝映綠波轉眼履香分散盡西陵歌吹欲如何
從此三臺頻易主雕甍繡柱紛無數靈風臺與逍遙樓
前者石勒後石虎石虎千乘萬騎來紅妝鹵簿亦雄哉
純灰未洗凶腸靜葛藟先將尋斧摧九華宮裏血腥赤
紫陌橋邊身首擲擲向橋邊僵不流殘肢斷體阿誰惜
不盡狼烽古鄴傍慕容滅後又元郎宮前一道灣環水
迤邐千秋淬劍鉞最後高齊更跼促樓臺土木紛相屬
小憐玉體真堪憐夜舞朝歌看不足歌舞方濃已倒戈
宇文鐵馬飲漳河鄧村束手甘臣虜不及貧兒襤褸多

臣海賦元
卷一四
家破國亡勢迅掃鄴南鄴北城傾倒李唐中葉更連兵
宮闕年深生野草野草青青古渡頭三臺王氣黯然收
秋風鬼哭仙都苑春雨人耕玳瑁樓祇有漳河依舊也
滔滔仍遶荒臺下人民城郭付滄桑好事猶尋銅雀瓦
銅雀瓦笑未真建安僞蹟已成塵縱真沙礫原易碎漫
把虛名動世人我來惟見水瀾瀾踏徧沙灘一百里兵
火無憂年穀登

聖人有道天心喜天錫吾

皇歷萬年河清海宴譜薰絃漳濱父老傳佳話好麥年

年上水田上水田豐菽粟報賽河靈村鼓續輶軒使者
采風來請讀臨漳漳水曲

漳水曲

國朝

戴喻讓 漢陽人

暮雲深灞橋逝水天橫歌臺廢玉龍金鳳已千年古瓦
還鐫銅雀字賣履分香兒女情讀書射獵英雄氣如何
橫槊對東風老年想作喬家婿

銅雀臺二首

國朝

袁枚 子才

停車欲訪魏遺宮銅雀荒涼片瓦空生對河山常感慨
死猶歌舞是英雄君王氣盡高臺酒兒女春殘甲帳風

七十五來神恍惚西陵可與茂陵同

殿上歸來履幾雙三分天下更分香一家樂府商聲老
八尺燈帷鄴水涼疑冢尙存兵法意招魂只用美人妝
傳心曾許諸姬嫁老去將軍話竟忘

漳干行

國朝 杜念祖

滔滔漳流不計年形勢變更幾萬千春日晴波魚可數
入夏萬頃盡茫然濁浪無邊平地湧禾沒奚從辨陌阡
水耕火耨前功棄家家向隅呼蒼天水退潮平波猶怒
數里折灣直奔注地裂岸崩不須與沃壤盡作馮夷窟

大木斯拔不見形蒹葭團結根難固吁嗟岌岌乎危哉
晝夜不舍數百步秋雨連綿浪忽生陰風怒起憾不平
薄暮冥冥人不見高樓複厦一時傾老夫攜兒婦抱女
黑夜但聞悲號聲南原北原邱厯厯新鬼舊鬼心戚戚
夜室雖云堅罔不畏水激開壙啟攢心更酸骸骨泥塗
難全覓蓬顛敝塚無人收髑髏慘目暴沙礫昔日賢令
說西門史公繼起民銜恩樂利共慶渠十二至今聞口
只空存魏武當年恣凶殘鑿池習戰喜坐觀溝渠皆壞
水因濁濤聲夜夜憾曹瞞我初嗟所遇終身常憂懼年

已七十意始平古今成敗有定數

煤渣山歌

有序

國朝

周壽梓

椅生

東峒旣廢臨境無山而煤渣歸然在縣署中自前明
作邑於此庖人傾棄煤灰累積而成迄今數百年豈
無題詠或未逢編輯遂至珠沈乃作歌一首以表章
之不計工拙聊以補遺

噫嘻乎大地之始土一撮泰山培塿水一勺及其至也
高山巍巍水洋洋環球八萬餘里何寥廓纖微累積成
大觀芥子能將須彌橐古人論學如爲山一簣一進何

其難然而荷鍤負畚進不已太行王屋等泥丸吾聞混
沌初開日煤兮煤兮皆植物體含燐炭硫養多塵土沈
淪入地腹陰陽爲炭橐籥抽洪鑪鼓鑄幾千秋造之化
之不輕出地不愛寶光自流方其在山甚寂寥豈知鑿
險緇幽一旦遭及其出山色黝堊豈知可作爨桐燒及
其燒盡無餘燼豈知死灰層疊且與山爭高熱血旣足
供世用賸脂尤能生林蒿噫嘻乎山不在高兮又何礙
乎低從此日進而不已嵩嶽雖高何難齊黃河如帶泰
如礪三臺東峒皆平夷上爲千仞萬仞之雲梯下有若

煙非煙之雲垂噫嘻乎丈夫進業當如此天下之事尙
可爲